

आकाशवाणी

खबरां

1. सुप्रीम कोर्ट नै नागरिक संशोधन कनून सी.ए.ए उप्पर रोक लाने सवां नां करी दित्ती ऐ। मामले दी अगली सुनवाई 9 अप्रैल गी होगी।
2. प्रधानमंत्री ते बीजेपी दे सीनियर लीडर नरेंद्र मोदी होरें अज्ज एनडीए चुना अभियान दे इक्क हिस्से दे तौरा पर केरल दे पलक्कड़ च इक रोड शो च हिस्सा लैता।
3. लोकसभा चुना दे पैहले गेड़ दे मतदान लेई अधिसूचना कल जारी कीती जाग।
4. कांग्रेस दी कार्यकारी कमेटी नै अज्ज लोकसभा चुनांs 2024 गित्तै पार्टी दे घोषणा पत्र बारै चर्चा कीती।
5. केंद्री मंत्री ते राष्ट्री लोक जनशक्ति पार्टी दे प्रमुख पशुपति कुमार पारस होरें अज्ज केंद्री मंत्रीमंडल थमां इस्तीफा देई दित्ता ऐ।
6. अमरीका दे राष्ट्री सुरक्षा सलाहकार Jake Sullivan होरें आखेआ ऐ जे हमास दी फौज दे उप-कमांडर मारवां ईसा दी इजराइल आस्सेआ कीते गदे हवाई हमले च मौत होई गेई ऐ।

<><><><><><>

SC-CAA

सुप्रीम कोर्ट नै नागरिक संशोधन कनून सी.ए.ए उप्पर रोक लाने सवां नां करी दित्ती ऐ। सुप्रीम कोर्ट नै सरकार गी पिछले हफ्ते अधिसूचित कीते गेदे कनून गी चुनौती देने आहली 237 याचिकाएं दा त्र'ऊं हफ्तें च जवाब देने आहला आखेआ ऐ। इस मामले दी सुनवाई मुख न्याधीश डी.वाई चंद्रचूड़, न्यायमूर्ति जे.बी पारदीवाला ते न्यामूर्ति मनोज मिश्रा होर करा'रदे ना। याचिकाकर्ताएं च इंडियन यूनियन मुस्लिम लीग, कांग्रेस दे लीडर जयराम रमेश ते तृणमूल कांग्रेस दी नेता महुआ मोइत्रा होर शामिल ना। इस मामले च अगली सुनवाई 9 अप्रैल गी होगी।

<><><><><><>

PM-Kerala Road Show

प्रधानमंत्री ते बीजेपी दे सीनियर लीडर नरेंद्र मोदी होरें अज्ज एनडीए चुना अभियान दे इक्क हिस्से दे तौरा पर केरल दे पलक्कड़ च इक रोड शो च हिस्सा लैता। आम चुनाएं दी घोषणा दे बाद मोदी हुंदा केरल च एहू पैहला अभियान समारोह हा। बीजेपी दे केरल दे प्रधान के. सुरेंद्रन ते पलक्कड़ ते पोन्नानी लोकसभा सीटें थमां एनडीए दे मेदवार बी प्रधानमंत्री हुंदा कन्नै इक खुल्ले छत आहली गड्डी पर सोआर होइए रोड शो च शामिल होए।

<><><><><><>

LS-Poll-Notification

लोकसभा चुना दे पैहले गेड़ दे मतदान लेई अधिसूचना कल जारी कीती जाग जेदे तैहत 17 राज्यों ते 4 केंद्र शासित प्रदेशें च 102 लोकसभा सीटें लेई 19 अप्रैल गी वोट पोआए जाडना। इनें 102 सीटें चा 39 तमिल नाडू, 12 राजस्थान, 8 उत्तर प्रदेश, 6 मध्य प्रदेश, 5-5 सीटां उत्तराखंड, असम ते महाराष्ट्र च, 4 बिहार, 3 पच्छिम बंगाल, अरूणाचल प्रदेश, मणिपुर ते मेघालय च 2-2 ते 1-1 सीट छत्तीसगढ़, मिजोरम, नागालैंड, सिक्किम, त्रिपुरा, अंडमान-निकोबार, जम्मू-कश्मीर, लक्षद्वीप ते पुद्दुचेरी च ना। 2024 दे लोकसभा चुनांs च कुल 7 गेड़ें च करोआए जा करदे ना। वोटें दी गिनतरी 4 जून गी कीती जाग।

<><><><><><>

Congress-CWC

कांग्रेस दी कार्यकारी कमेटी नै अज्ज लोकसभा चुनांस 2024 गित्तै पार्टी दे घोषणा पत्र बारै चर्चा कीती। कमेटी दी बैठक नमीं दिल्ली च लग्गी जेदे च पार्टी अध्यक्ष मल्लिकार्जुन खड़गे, साबका अध्यक्ष सोनिक गांधी, राहुल गांधी ते प्रियंका वाडरा, पी. चिदंबरम, दिग्विजय सिंह, अजय माकन, के.सी वेणुगोपाल सने होरनें सीनियर लीडर शामिल हे। मीटिंग मगरा श्री वेणुगोपाल होरें पत्रकारें कन्नै गल्लबात करदे होई दस्सेआ जे कार्यकारी कमेटी नै पार्टी अध्यक्ष होरें गी चुनावी घोषणा पत्र बारै खीरी मंजूरी देने लेई अधिकृत कीता ऐ।

<><><><><><>

RLJSP

केंद्री मंत्री ते राष्ट्री लोक जनशक्ति पार्टी दे प्रमुख पशुपति कुमार पारस होरें अज्ज केंद्री मंत्रीमंडल थमां इस्तीफा देई दित्ता ऐ। इयां लोकसभा चुनाएं लेई बिहार च एनडीए दे सीटें दी बंड आले समझौते दे बाद होआ ऐ जेदे च पशुपति कुमार पारस हुंदी पार्टी गी चुना लड़ने लेई कोई सीट नेई दित्ती गई। अज्ज नमीं दिल्ली च मीडिया कन्नै गल्ल करदे होई पारस होरें ऐलान कीता जे उंदी पार्टी कन्नै कथित तौरा पर बेन्यायी कीते जाने करी ओह इस्तीफा देआ करदे ना। तोआई राज ठाकरे हुंदी अगुवाई आली महाराष्ट्र नवनिर्माण सेना दे एनडीए च शामिल होने दी मेद ऐ। ठाकरे होरें अज्ज नमीं दिल्ली च बीजेपी दे सीनियर लीडर ते केंद्री मंत्री अमित शाह ते पार्टी महासचिव विनो तावड़े हुंदे नै बैठक कीती ऐ।

<><><><><><>

Hamas

अमरीका दे राष्ट्री सुरक्षा सलाहकार Jake Sullivan होरें आखेआ ऐ जे हमास दी फौज दे उप कमांडर मारवां ईसा दी इजराइल आस्सेआ कीते गदे हवाई हमले च मौत होई गई ऐ। इजराइल दे समाचार सूत्रें जानकारी दित्ती ऐ जे ईसा दी पिछले हफ्ते इजराइल दी वायु सेना आस्सेआ मध्य गाजा च नुसरत विस्थापित कैंप उप्पर कीते गेरे हमले च मौत होई गई। दुए पास्से गाजा उप्पर नियंत्रण रखने आहले फिलीस्तीनी ग्रुप नै इसा दी मौत उप्पर कोई अधिकारिक टिप्पणी नेई कीती ऐ। 7 अक्तूबर सवां शुरू होए दे युद्ध च इसा हमास दा मारे जाने आहला सारें शा सीनियर लीडर ऐ। ईसा दा नां अक्तूबर च इजराइल उप्पर हेए दे हमले सरंधी फैसले कन्नै सिद्धे तौरा पर जोड़ेया जंदा ऐ।

<><><><><><>

NIA

राष्ट्री पड़ताल एजेंसी एनाआईए नै केरल च आरएसएस दे लीडर श्रीनिवास दी हत्या दे जुर्म च फरार बंदश याफता पापुलर फ्रंट ऑफ इंडिया दे मिम्बर गी गिरफ्तार करी लैता ऐ। एनआईए मुजब शफीक 16 अप्रैल 2022 थमां पलक्कड़ च गै फरार चला रदा हा। ओह मालारपुरम जिले दा रौहने आहला हा ते पी.एफ.आई दा मिम्बर हा।

<><><><><><>

Court-Sisodia

दिल्ली दी राउस एवन्यू अदालतें दिल्ली दी कथित आवकारी नीति घोटाले च आम आदमी पार्टी दे लीडर मनीष सिसोदिया दी न्यायिक हिरासत 6 अप्रैल तोड़ी बदाई दित्ती ऐ। एह फैसला ई.डी आस्सेआ दायर काले धनै गी जायज बनाने सरबंधी मामले दे सरबंधे च मनीष सिसोदिया दी अदालतें च पेशी मगरा आया। एहदे शां पैहले अदालत नै आवकारी नीति घोटाले सरबंधी मामले च सी.बी.आई आस्सेआ दायर याचिका पर मनीष सिसोदिया दी न्यायिक हिरासत 22 मार्च तोड़ी बदाई ही। सीबीआई नै उनेंगी फरवरी 2023 च गिरफ्तार कीता हा। ई.डी नै अपने आरोप पत्र च मनीष सिसोदिया गी मुख आरेपी बनाए दा ऐ। उनें 28 फरवरी 2022 गी दिल्ली मंत्रीमंडल सवां इस्तीफा देई दित्ता हा।

<><><><><><>

VP-RS

राज्यसभा दे अध्यक्ष जगदीप धनखड़ हों परतियै चुने गेदे राज्यसभा दे मिम्बर संजय सिंह हों गी अज्ज भवन च सगंध चकाई। आम आदमी पार्टी दे लीडर संजय सिंह एल्लै दिल्ली आबकारी नीति कन्नै सरबंधी काले धनै गी जायज बनाने आहले मामले च न्यायिक हिरासत च न।

<><><><><><>

NCW-RPF

महिलाएं गितै राष्ट्री कमिशन नै मनुक्खी तस्करी गी रोकने गितै रेलवे सुरक्षा बल कन्नै इक समझौता पत्र उप्पर दस्तखत कीते न। इस मौके पर बोलदे होई एनसीडब्ल्यू दी प्रमुख रेखा शर्मा हों आखेआ जे रेलवे स्टेशनें उप्पर तैनात कीते गेदे रेलवे सुरक्षा बल दे जवान महिलाएं ते बच्चें खिलाफ अपराधें गी रोकने लेई महत्वपूर्ण भूमिका नभा रदे न। उनें आखेआ जे मनुक्खी तस्करी दे 70 फीसदी मामले महिलाएं ते बच्चें कन्नै जुड़े दे न। आर.पी.एफ दे महानिदेशक मनोज यादवा हों आखेआ जे इस समझौते पत्र दा मकसद महिलाएं ते बच्चें गी सुरक्षित रेल यात्रा दा अनुभव कराना ऐ।

<><><><><><>

IAF-Sport person

भारत वायु सेना आस्सेआ अज्ज क्रिकेट खडारी पुलकित नारंग, मोहम्मद नूरहसन ते हिमांशु गी राष्ट्री ते अंतरराष्ट्री सतह उप्पर बेहतरीन प्रदर्शन आस्तै 19 होंर दुए खडारियें कन्नै सम्मानित कीता गेआ। भारत दे वायु सेना अध्यक्ष वी.आर चौधरी हों नमीं दिल्ली च आयोजित इक समारोह च वायु सेना कन्नै जुड़े दे इनें सब्बनें खडारियें गी सम्मानित कीता।

<><><><><><>